



玄覽卷之五

豫章朱謀埠鬱儀甫著

金玉篇

山下有銀上必產蔥下有黃金上必產薤下有
銅錫上必產薑水圓折者有珠方折者有玉清
水有黃金龍淵有玉英上有丹砂下有黃金上
有蔥石下有銅金上有陵石下有鉛錫赤銅上
有赭下有鐵草莖黃秀下有藏銅凡觀金玉寶
劍銅鐵之氣皆以辛日雨霽之日及黃昏夜半
伺之光白者玉也赤者金也黃者銅也黑者鐵

也黃金之氣赤黃千萬斤以上光大若鏡盤金
氣發本上赤下青焉王之所在其氣青以浮圓
而光轉其地中常潤黃金之氣爲火白金之氣
爲雄雞銅鐵之氣爲胡人銅器之精爲馬美玉
之氣爲美女載燭金至百斤以上其精爲羊
金產金沙江者紫以瑩產麗江者赤而膩醇金
之表椒花鳳尾紫赭之色具焉雜以銀者試之
石無聲而色青雜以銅者試之石劇然有聲投
之火則黑鍊瀕而成謂之藥金投之火則飛迸
亾去金生則色淺而質輕熟則深赤而質重凡

金七青八黃九紫十赤

美玉白如截肪黑如純漆赤如雞冠黃如蒸栗
玉之上也白如膩焉雪華焉黃而焦焉碧而黓
焉綠而白糝糶焉王之次也非青非綠是謂菜
色玉之下也安西諸蕃產五色之玉倭奴產青
玉交州白玉光可以鑒夫餘之國有火玉可以
燃興國有軟玉可直可屈王之古者四等曰漆
古渠古土古甄古

金之品十有九等曰還丹之金曰水中之金曰
瓜子之金曰青麩金曰草砂金皆良金也曰雄

黃金雌黃金硫黃金曾青金土中金朱砂金曰
生鐵曰生銅曰鑰石曰砂子曰土碌砂子曰金
母砂子曰白錫曰黑錫

西域大食之寶有赤瓊焉有綠石焉有鴉鶻焉
有藍石焉有碧石焉赤瓊曰紅刺曰避赭達曰
昔刺泥曰苦木蘭凡四等綠石曰祖巴璧曰祖
木刺曰撒木泥凡三等鴉鶻曰紅亞孤曰青亞
孤曰黃亞孤曰白亞孤曰馬斯良氏曰禰藍曰
渥撲尼藍凡七等藍石曰貓睛曰羸子曰走水
石凡三等碧石謂之甸子曰禰舍僕滴曰乞里
馬泥凡二等

水晶北產者偏黑南產者偏白信州產者濁而
不清倭國產者爲最上蠟子有紅蠟紫蠟酒蠟
凡三等馬價珠有青而翠者轉深青者夾石而
粉青者脂煙色者凡四等琉璃有赤者白者黑
者黃者青者綠者縹者緋者紅者紫者凡十等
金星石有醇青者金星而褐者白而不瑩者凡
三等白而不瑩者謂之硝子玻瓈有酒色者紫
者醇白者凡三等雲母黃白多青者曰雲英青
黃多赤者曰雲珠乍青乍白謂之雲砂黃白晶

晶者謂之雲液睨于日下青白而多黑者謂之雲母醇白徹明者謂之磷石黯黯然醇黑有文班然如鐵者謂之雲膽色雜黑而強肥者謂之地涿凡八等

珠大五分至一寸九分爲大品偏小偏圓如覆釜者爲璫珠其次爲走珠其次爲滑珠其次爲礫砢之珠其次爲官雨珠其次爲稅珠其次爲蔥符之珠凡九等大珠外有小珠環焉謂之珠母蜀之廣陽產青珠焉永昌博南產光珠焉河鈎差產金珠焉林邑黃支之洲產明珠焉

珠者陰之陽也故勝火王者陽之陰也故勝水雲母入地千歲而不朽琥珀所生其旁無草印毒之澗產金剛焉流洲之上產昆吾焉皆可割玉蕃磧之中有聖鐵焉舍之可以辟兵須彌之山有吠瑠璃焉火不能銷金不能破烏場之國有消石焉能消金石爲水三佛齊國有摩浴之石焉能伏三黃匱五金制鉛汞麗水之中有鐸銷焉所指無不洞達沃焦之山有飄石焉以之澤繪夜隱而晝見南海礁磧之間有方諸之脂淚焉以之澤繪則夜見而晝隱

珊瑚生于海中石上一年自白而黃三年而赤
四年不取則蝕敗焉黃金千年化而爲水銀積
艾三年焚之其液流而爲鉛錫蜂藪藝而爲琥
珀蜻蛉之目瘞而爲青珠金翅鳥口沫結而爲
木難懸鉛酒甕中閉之四十九日化而爲胡粉
其弗瑩白者煨而爲黃丹黃丹之渣爲蜜陀僧
一物而三變焉淬鐵以膽礬則變而爲銅燒銀
以硫黃則化而爲鐵塗錫以水銀則腐而爲泥
煨丹砂以凍青草鉛花則成至寶焉

丹砂伏火成滑以之變銅而爲銀變銀而爲黃
金曾青結汞而制丹砂雲母紫礬皆足以制汞
滑石可制雌雄黃水銀可以勾金磁石可以養
汞伏龍肝可伏砂而縮賀賀者錫也石灰伏硫
黃而制硃砂砒霜化銅而乾汞紫背之鉛碎金
神砂粉鐵修天拒火

辨琥珀者拭之熱而拾芥焉辨瑪瑙者拭之木
而弗熱焉辨鋼鐵者累煨之而弗耗焉凡瑪瑙
錦而華曰錦虹漆黑而函白文曰鶴子黑白間
曰截子紅白相錯成文曰躔絲色澹而華謂之
漿水紫而紅華謂之醬斑平視之色白以瑩睨

視之若凝血然謂之夾胎夾胎最上蛇色而鬼面者爲最下

黃銀辟鬼金剛石辟惡毒清泥珠止濁水珠發泉金螯產于石中可集泉布紫辣羯可以馮河寶母可以致寶琉璃可以貯猛火之油

貝十二等赤電黑雲謂之紫貝素質而紅黑文謂之珠貝青質綠文謂之綬貝黑文而黃畫謂之霞貝黑白半謂之浮貝黃脣點齒而有赤駁謂之濯貝黑鼻而無皮謂之雖貝赤帶通脊謂之臙貝赤幟內甲赤絡者謂之惠貝青脣赤鼻

謂之營貝脊倮而脣勾謂之碧貝赤而圓中謂之委貝委貝強志伏百獸碧貝使童子善盜營貝使人淫惠貝善忘臙貝消孕雖貝善瘡濯貝善驚浮貝善寡霞貝善服蛆蟲綬貝消氣障珠貝明目紫貝愈疾

寶物所藏其氣上伐林木視柯榦偏有枯折者寶之所在也山有積銀上多素霧山有玉而木潤淵有珠而崖不枯

鐘鼎篇

三代制器曰鐘曰鈺曰鼎曰鬲曰盃曰鍤曰甗

曰盥曰洗曰銷曰盆曰鑑曰杆曰匱曰壺曰甌
曰尊曰罍曰彝曰卣曰舟曰瓶曰罌曰爵曰斗
曰卮曰角曰柶曰觚曰竿曰敦曰簋曰簠曰豆
曰鋪曰錠曰罍曰鐸曰磬曰饒鍾有特鍾罍鍾
編鍾凡三等鈺類鍾而庠短盃類鼎而有味有
攀鬲類鼎而空足鍍類金而大甗類甑而通中
盥類洗而大腰有足攀銷類洗而小鑑類銷而
大甗類壺而庠卣類壺而有足攀簋形方簋形
圓皆容一斗二升豆容四升鋪類豆而短一升
曰爵二升曰觚三升曰解四升曰角五升曰散
六升曰竿七升曰觥彝六等曰雞彝鳥彝竿彝
黃彝虎彝蜚彝皆有舟尊六等曰獻尊象尊壺
尊著尊大尊山尊皆有罍罍類壺容酒一斛舟
類洗而有耳

鍾鼎凸而紋者欵也凹而銘者識也夏商之識
凹秦漢之識凸凡欵有雲文雷文山文輕重雷
文垂花雷文鱗文細文粟文蟬文黃目文飛廉
文饗饗文蛟螭文蚪龍文麟鳳文熊虎文龜蛇
文鹿文馬文象文鸞文夔文犧文雌文鳧文雙
魚文蟠虺文如意文稊草文瑞草文篆帶文凡

鍾鼎之制有百乳輔乳碎乳鸚耳貫耳偃耳直耳附耳挾耳獸耳虎耳獸足夔足百獸三螭立夔雙夔

凡銅物入土千年而青入水千年而綠瑩在人間者紫褐而朱斑其色有蠟茶者有漆黑者凡辨古彝器夏欵欵以金商欵質素周欵雕巧以織古敦鼎以丹砂鸚斑爲尚今以漆古頽古文爲尚古器尚大今器尚小

鍾鼎之齊六金而一錫斧斤之齊五金而一錫大刃之齊四金而一錫制殺之齊三金而一錫鑿燧之齊金錫各半凡鑄金之事金與錫黑濁之氣竭黃白次之黃白之氣竭青白次之青白之氣竭青氣次之然後可得而鑄矣

虞舜始陶周世宗始作秘色之甕是爲柴陶宋有定州陶汝州陶處州龍泉陶汴京官陶內陶董陶哥陶 本朝進御以景德陶凡辨古陶者柴陶色青以淡其理膩以滋其文細其足黃以質定陶有劃花者繡花者素質者有紫定墨定白定凡三種汝陶其文蟹瓜其色淡以青處陶土脉細以薄有翠青者粉青者官陶之質細以

潤其色青紺其文蟹爪其口紫其足鐵色內陶
質緻而色青董陶青而不紺紫口鐵足而麤質
哥陶紫口鐵足其色白其文斷碎若折凡陶物
所忌者三茅篋骨砣澤不具曰骨罅拆曰篋邊
毀剥曰茅陶之中有同是質而忽異其質者有
同是色而特異其色者是謂窳變其爲物也必
奇而有神

銅器之藏見其狀而望焉輝輝然齊器象牛楚
器象馬越器象蝦蟇宋器象白狗秦器象豚燕
器象豕

玄覽卷之六

豫章朱謀瑋鬱儀甫著

草木篇

棗杏之屬爲核果梨柰爲膚果柳胡桃之屬爲
殼果松栢之實爲檜果棘實爲棗杼實爲椽桑
實爲椹楮實爲任櫟實爲皂穀實爲粟菽實爲
豆瓠實爲犀薺實爲莖草實爲莢芙蕖之實爲
蓮莎實爲媞臬實爲廢木謂之華草謂之榮不
榮而實曰秀榮而不實曰英竹萌謂之筍蘆萌
謂之薤穀稻之萌謂之秧槐棘醜喬桑柳醜條

桃李醜核椒檉醜菜

柘宜山柞宜阜楮宜澗谷柳宜汙田竹宜平原
橘過江北則爲枳蕪菁移于南土則爲菘水松
逾嶺北則香并州無葫蒜西戎無薺茗豌豆度
井陘以東山東之穀子入壺關上黨皆苗而不
實李博桃而本強者其實毛梅博李而本強者
其實甘桑之博梨也實脆以甘苦棟之博梅也
其華黑柿三博則其實不覈矣銀杏臨水而植
則實蕃栢性指西若榴宜東竹引東南葡萄引
西南江南之薺夜華江北之薺晝華

蛇牀之苗亂薜蕪杜衡似細辛薺芫似人參百
部似門冬狼毒亂防葵鉤吻亂黃精拔楔似草
薜樗似柀迷繫似檀枕似豫章披似櫛櫛謂之
紗櫛謂之羅棟謂之綾櫛大而聳披小而垂榎
敲而小楸敲而大栢葉松身謂之檜松葉栢身
謂之櫛

桃三年而實李四年梅十一年銀杏三十年桃
十年而實小李壽三十年荔支壽二百年柳一
歲而丈三歲而椽柞十年而椽二十年而檇竹
六十年一易根鐵樹六十年而一華海棗五年

而一實筑陽孤竹三年而一筍南陵金盤之草
一歲而一節著草七十年而益一莖奚毒一歲
爲薊子二歲爲烏喙三歲爲附子四歲爲烏頭
五歲爲天雄人參千歲爲小兒枸杞千歲爲犬
子松脂千歲爲茯苓楓脂千歲爲琥珀著草千
歲而神栝根千歲爲坐人

麻麥之相爲候也麥黃則藝麻麻黃則藝麥禾
生于棗黍生于榆大豆生于槐小豆生于李麻
生于荆大麥生于杏小麥生于桃稻生于楊柳
凡栽藝者各趨其時棗雞口槐兔目桑蠶眼榆
負瘤雜木鼠耳栗種而不栽柰也林檎也栽而
不種茶茗移植則不生杏移植則六年不遂
茱萸氣好上椒氣好下合歡蠲忿萱草忘憂梅
令人津芥令人泣楓菌令人笑茗令人寤榆槿
令人寐醉草令人睡苜棗令人不惑左行之草
令人熱門冬赤黍令人不醉太極山有采華之
樹服之通萬國之語河中永洛有無核之棗服
之可以度世聚窟洲有反魂之樹其香起死霍
山有神草三十四種少室有壽榮之草服之可
通百神

椒目來瀕構液膠丹檉灰錄銅海芋變金皂莢
碎鐵鳧茨腐銅地榆金鹽煮石天柱之茗化肉
棋敗酒藕泮醜藹車辟蝟蠹直草辟蚊蠅柳得
鹽而實蕃橄欖得鹽而實隕木得桂而槁桂得
蔥而軟麻見漆而涌漆見蟹而解瓠死于燒瓠
瓜死于煮漆大蒜靡蔗岡桐槁荷阿魏槁柚醜
草消玉莧殖剖鼈朱草剖人

葉下於鬱鬱下於莧莧下於蒲蒲下於葦葦下
於萑萑下於萋萋下於蕭蕭下於薜
薜下於萑萑下於茅凡草物十有二衰焉

歲甘則薺菜先焉歲苦則葶歷先焉歲惡則水
藻先焉歲旱則蒺藜先焉歲雨則藕先焉歲病
則艾先焉歲流徙則蓬草先焉常以五木候五
穀之豐儉與食桃則栗儉食李則黍儉食杏則
麥儉杏多實不蟲者來歲爲之穰大葵不蟲者
牛馬爲之賤秋葵下小葵生者牛馬爲之貴
菑之絳也藍之青也歲之碧也藐之紫也蕪之
綠也梔之黃也櫟斗之皂也蘇方之赤也槐莢
之齡也是皆丹青之佐也臨安有酸角之醢蔬
焉真臘有咸平之酢樹焉瓊管以嚴樹爲之酒

瓜哇以柳漿爲之酒蒲喇加以茭葦之實爲之
酒緬甸以貝葉之實爲之酒烏孫以青田之核
爲之酒南海有梳柳之麩南中八郡有蒺木之
麩交趾有都勾之麩蒲喇加有沙孤之米江東
之油荏子也北土之油大廢也拂林之油羣漢
也波斯之油齊啣也牂牁之績桐也林邑之績
古貝也驃國之績娑羅也日南之績木櫟也咸
寧之績綸木也各任土以足其用者也

瓊州有占風之草興化有候潮之莢衢婺洪饒
之間有草犀巴西有草鼓交河有草蜜焉端溪
有肉樹焉常山有護門之草觸之則叱然有聲
東海有倒生之木觸之則葉翕施州有普舍之
樹四時作華其華百種邛州有芙蓉之木五色
代變隨州有菱華之藤朝脯異其色上黨有不
灰之木醮以石腦油則燃大食之西有嬰彌之
樹見人善笑摘之則槁真臘有勒佉之樹霧雨
之霽輒產紫鉚交州有蜜香之樹焉一本四香
而四十有二狀廣州有膏藤其膏可以陸地行
舟南荒有如何之樹其實似棗其長五尺剖以
金刀則其蘆刀則辛竹刀則苦木刀則酢東南

荒有綺縞之樹三百歲而華又二百歲而實東
荒有粗稼樞樹三千歲而華九千歲而實

菖本林蘭生于石蘋萍荇藻生于水宛童兔絲
生于木莢菌樹雞生于朽株楓人生于雷雨藟
蒨地蠶延藜生于零露種商陸薯蕷者切之種
紫薇薔薇葡萄者折之種牡丹木犀者別之槐
因麻以植瓜因菽以茁鍾藤綠樹以立鞠萎而
不零蕉葉槁而不籜梧實綴于箕檳榔之房出
于葉松根遇石則偃其枝荔支去宗根則子不
覈三葉白草秀畢啼鴟歌章陸實

含桃來鳥榼梨來蜂松栢來鼠人子之藤來象
降真之香來鶴蘇割刺之椒來鳳凰

萸莢知朔蕤荷叱蠱芙蕖晝炕凌久之華夜炕
合歡夕聶守宮之槐朝聶胡椒之葉朝展而夕
翕赤箭也獨活也皆無風獨搖銀杏也乙夜而
華丙夜而實虞美人草聞吳歎而舞紫薇樹搔
之則顫沙筋聞人聲則縮牧靡之涪曝之日則
濕雀芋處濕地而燥慈孝之竹一歲再筍冬外
生夏內生南中之澤有石髮焉隨晦朔生死割
漆者以味旦樹蘭者以女子種胡麻者夫婦俱

潯陽之楠西榮則東枯大庾之梅南煖而北寒
牂牁之交讓也兩樹相代而爲盛衰竹米而枯
蕉華而槁松栢錫而榴萌瓜有鱗鬣焉篔簹有
嬰媿焉卷施拔其心弗死水藤斷根輒生芸蒿
可以死而復榮涪陵有靈壽之木高潘州有千
歲之蕨伊尹墓之棘直周公墓有模木其葉四
時代色孔林有楷木無橫理梧之葉也芘菰之
實也芋之魁也藕之蒂也皆識閏者也黃楊當
閏而減長木芍藥當閏歲而華減其豔襄陽石
階山有救窮之草冬夏不凋

石蓮別鹵水之鹹淡移楊正酢酒阿魏止臭蠟
花解砒毒都淋之藤洩蠱焉棗覈之仁却百邪
焉萊菔解麥毒焉甕菜解治葛焉吉財牧靡金
蛇白藥之草皆可解蠱毒焉

高潘有踈節之竹六尺而一節黎母山有文節
之竹溱州有通節之竹羅浮有龍公之竹臨賀
有十抱之竹澄州有方竹占城有藤竹員丘有
船竹東方有弓竹焉郄曲如藤得木乃倚南荒
有沛竹焉其長百丈

老韭爲菟老血爲萍枯竹生火老槐自焚柿含

文理播移虛中籜竹實中荆木內方天楠羊桃
外方白蓉之汗如漆芭木之汁如血桃枝竹四
尺爲一節木瓜一尺而百二十節娑羅之樹七
葉優鉢羅之華九房

桃杏華六出者必鬱鬱仁者殺人瓜兩鼻者殺
人芹之赤葉也董之黃華也食之皆殺人無蓀
毒鼠葶藶毒魚杏核毒豕桂毒獺胡蔓之草斷
腸押不蘆草鳩人三日而蘇曼陀羅花令人昏
醉決明實能令人跛莨若令人見鬼杏實能令
人昏芡實能令小兒弗長野菊瀉人野芋殺人
蔓菁殺鼯蛛苦蕒之氣敗蠶蛾昌蒲去蚤虱仙
靈脾淫羊冬藍消鼈痕白鮮已鼠瘦訶梨勒化
海魚之涎景天辟火石榴之實醉三尸拾樞之
木厭邪鬼

石南之木指南胡桐之淚釵金銀枕柳之材斲
石中蕉柳則敗楨櫨潰柿榧實粉蔗稷皮入土
千歲而不敗麻黃之宿根不積雪六畜不食胡
麻蝗蟲不害苴苗

容梧之蒿可棟高潘之蕨可杖蘇門答刺之瓜
茄一種而五歲儋州之荷四時作華北荒有七

寸之棗南荒有三尺之梨東荒有三尺之椹木
蘭皮國有五尺之瓜三寸之麥暹羅之稻粒盈
寸也羅島之麻實如蓮蒨

松爲百木之長蘭爲百草之長桂爲百藥之長
梓爲百木之王牡丹爲百花之王葵爲百蔬之
王綸組也紫菜也海中之草也珊瑚也琅玕也
海中之木也

玄覽卷之七

豫章朱謀瑋鬱儀甫著

禽蟲篇

龍易骨龜易甲犀易角象易齒蟹易螯蛇易殼
孔雀易尾麋以冬至解角鹿以夏至解角麝以
春退其香

龍之鱗八十有一鯉之鱗三十有六鱗肉角而
不觸鳳肉喙而不啄鱧骨脆獾骨實蛟骨青鳳
骨美龍珠在頷鮫珠在皮蛇之珠在口魚之珠
在目蚌之珠在腹鼈之珠在足鱗目圓蛟眉連

蜃鱗逆蝮臯反狼腸直鸚喙曲獬羊之角重於
肉斲木之舌長於喙犀體兼五種肉象體具十
二少肉或云有百獸肉

麟之所在百獸從焉鳳之所止百鳥環焉神龍
所經盆盎涌焉海犀所涉江河圻焉麒麟之鬪
日月食焉鯨魚之死彗星出焉狸牛之搏海水
沸焉越睽殺犀疾雷及焉

鱗黃魴青鱧玄鰻白鯉赤魚質之別也鱗獨鱣
羣鯊沈鱗浮魚性之別也刀鱗可割鰻之脊可
編鱗食羸鮫食草鱣食鮫矢鯢三相從而爲部

鰻歸三相從而名妾川魚鱗白淵魚鱗黑正月
鯊鱠至二月鯉至三月鰻至四月鱗至八月黃
鱗至九月蟹至仲冬豚魚至

貉不踰汶鸚鵡不踰濟鱗不入江杜鵑不入
洛朱提以南無鳩鵲蜀郡無兎鴿江南無狼馬
岳陽之人不獵兎巴陵之人不弋鳥楚人惡聞
鵬吳人惡聞鼯南人惡聞豺北人惡聞訓胡巫
山有迎船之鳥彭澤有接食之鳥峨眉有佛見
之雀道州有祠舜之徂蒼梧有象耕馬會稽有
鳥耘焉

熊有館麝有溷麋有峻鹿有場螽有衙蟻有臺
蠃有房范有冠蟬有綏鯽有印鷗有綬鸞有帆
鷓鴣有柁烏鰂有纜蛟有尾環雀有脂餅

燕千年而髯虎千年而角獾百年而白鵠百年
而紅又五百年而黃又五百年而蒼鹿千歲而
蒼又五百歲而白又五百歲而玄獼猴八百歲
而爲獾獾五百歲而爲獲服翼千歲而白燕千
歲而其巢北向烏千歲而五色蟾蜍萬歲而丹
額蛇有無窮之壽虎鹿兔皆壽千歲滿五百歲
而色白狸狼皆壽八百歲鼠壽三百歲騏驎壽
二千歲騰黃之馬吉光之獸皆三千歲鶴千歲
而後集于木龜千歲而浮蓮葉之上

鴛鴦宛頸烏鵲傳沫鸚鵡鵠交足鵠鵲屬其晴鸛
影抱蝦蟇聲抱孔雀聞雷而孕兔顧月而胎鰻
鸞漫產鼯鼠飛生盧鵝嘔子餘與鼯同居糖牛
與蛇同穴蛇求于龜則產龜蛇求于雉則產蜃
鼈伏于淵卵剖于陵果羸祝于外蜂產于內夏
雀生鷓楚鳩生鴉鴿亦產鳩鵲亦產鴟鵂亦產
鶴鷹亦產狗鮎亦產鰻鰂亦產蚊牛亦產麟
鹿角牛耳駝首鬼目蛇項蜃腹魚鱗虎掌鷹爪

龍之狀也鴻前麇後蛇頸魚尾鸛頰鴛思龍文
龜背燕頤雞喙五色備舉鳳之狀也麇身牛尾
狼頭馬足圜蹠肉角麟之狀也有角爲虬龍無
角爲螭龍有鱗爲蛟龍有翼爲應龍角浪凹峭
上壯下殺龍之雄也直鼻圓嵐薄鱗壯尾龍之
雌也鳳之青曰鶡赤曰鶡黃曰馬白曰鷩紫曰
鶡麟之青曰鴛孤赤曰炎駒白曰素冥黑曰角
端黃曰麒麟

熊畏鹽獺畏酒蚺畏葛鼈畏蔥燕畏艾魚畏楸
欖蜘蛛畏蕪菁驢馬之駒畏鑪灰雞雛畏柳薪
龜畏桑薪刀鱗畏楛河豚畏葭茨龍畏鐵狐畏
鵠頭蚊畏鰻骨海馬畏糟魄風生之獸畏菖蒲
魚畏巴菽羊畏躑躅

狼倒卓以卜虎圻地以筮鸛禹步鴛畫印獺祭
圓豺祭方蛇蟠向壬鵲巢面歲燕伏戌巳蝠伏
庚申虎奮衝破倉庚知春分伯勞知夏至虔鵠
知來猩猩知往狒狒自知死生虎識字角端知
四夷之語象知地之虛實橐駝知泉脉之所在
魚伯識水旱之氣蜉蝣曉潛泉之地鵲知風之
高下獬廌知人之邪正鷓鴣向日而飛玄鯉向

斗以游兔恒向月而息鵲髡于七夕海扇見乎
上巳鷓鴣羸于孟冬短狐上弩于孟夏之朔蜉
蝥群死于白露之朝數九之蟲九土三百而潮
至移風之雞當潮至而輒鳴烏鳳曉百蟲之音
反舌解百鳥之語風狸遇風則行空橐駝遇瀟
風則埋其鼻純將風則踊鬪將雨則鳴鵲將風
則啼商羊將雨則起舞鳩暮鳴則雨鸛朝鳴則
風蛤暈隨潮以數其文獺肝隨月以生葉

睢鳩別處鴛鴦偶棲雀夕替鳴晝音鳩拙而安
鷦巧而危烏反哺梟反噬裸狢愛類誅珂之鳥
惡其類虎交不再雀交不一雛上無尋鷄上無
常雉上有丈鷄上有尺雉飛不越分域鶉飛不
越橫草龜屬外骨鬣屬內骨蚓却行蟹久行魚
連行蛇紆行

麋喜山麋喜澤鹿喜林鵠善步鳧善趨鷹善立
雀善躍鼃善踊隼善翔鷗善浮鳧善沈鸛以怨
望鴟以貪顧雞以嗔睨鴨以怒瞋雀以猜瞿燕
以狂矚鶯以喜囀烏以悲啼鳶以飢鳴鶴以潔
唳鳧以凶叫鴟以愁嘯

鹿食龜麕食蛇蜃食燕鮫鯉食蟻鷲鳥噉羊蚱

蛆其帶蝸牛食蠍鱷食廉豕酋耳食虎蛟食犀
角犀食棘蛇食茱萸獾食鐵駱駝食火獨斗之
獸亦食火火雞食燃炭骨託之鳥食鐵石英雞
食石英雕鷹角鷹食獐鹿鴉鶻食鴻鷺海東青
食鴛鴦鷓老兔鶻食兔與狸黃鷹食鳧雉鷄食
鶉鳩梟食其母破獍食其父乾吉之鳥食其子
山鳳殺其雌

雞二十日而化鷺三十日而化貓狸二月而生
狗三月豕四月獾五月鹿六月虎七月蟲八月
而化獬十月而產馬牛十二月而育象三歲而
乳牛三歲而兩齒四歲而四齒五歲而六齒六
歲而後春歲益一節馬四歲而兩齒五歲而四
齒六歲而六齒具矣七歲右齒缺八歲上下
齒缺九歲缺盡十歲下之二齒齠十一歲四齒
齠十二歲下六齒齠十五歲而下齒盡平十八
歲而上齒盡齠二十一年上齒盡平驢馬之駒
朔前產者隨母行朔後產者先母行月望產者
並母以行羊以正月產者爲上羔仲冬產者爲
次羔季春以後產者爲下羔
白羊爲粉黑羊爲瑜白牛爲犏黑牛爲犛驢父

馬母而產羸馬父驢母而產馱馱驢父牛母而
產駃駃凡馬之力在前髀驢力在髀羸力在腰
凡魚之膽春夏沉秋冬浮蚺蛇之膽上旬近首
中旬近心下旬近尾象膽隨十二月轉在諸肉
之所分熊膽春在首夏在腹秋在左足冬在右
足

鼈所處必浮沫烏賊所處必吐墨鷺之啄也絲
偃焉鷹之捕也角弭焉虎攫物也三躍不中則
舍而去之猴攫攫人則反顧狒狒攫人則笑獼
攫人則求匹貉爲獾導塵爲獾君豺遇狗而跽
鹿遇虎而鳴鷲飛則蜮沈鷓鳴則蛇結鼃一鳴
而龜伏獨一叫而猿散鴉激矢鷲毛脫鷲居谿
蠱蝨除蝟使虎申蛇令豹止鵲令蝟仰鼠令猿
伏鷓令魚沸

鵠無舌兔無尻猴無脾鳥無胃鼈無耳蟹無腸
蝮蟻無鼻蟬無口蚓無筋蛤蜊無藏鯢無膽麀
鹿無魂水母恃乎蝦瑣蝮恃乎蟹蛩蛩距虛恃
乎麀鼠翼恃其雌鼃鼃之屬以脰鳴精蛎以注
鳴蝸蛄以腹鳴發皇以翼鳴蝮蟻以股鳴榮螻
以胷鳴蛇豸腹窟蟻螬背行蠶食而不飲蟬飲

而不食齧吞者入竅而卵生咀嚼者九竅而胎
生食草者多力而愚食肉者勇敢而悍無角者
膏而先前有角者脂而先後

蟾肪軟玉龜脂燃鐵鸞血續弦鳩糞朽石金得
伯勞之血則昏鐵得鷓鴣之膏則瑩石得鵲髓
則化銀得雉糞則枯墨得龜溺則透石乳酪得
狻猊之湮則爲水

塵辟蠹蠊敗漆燕鞞貂鶴石姬卵鵲枕媚男狸
頭愈鼠雞頭已瘦蝨散積血斲木愈齟齬鯁拔
刺虎須治齧蛛絲去疣螬君子易產蚶脂萎陽

狒血見鬼魅龜脂察蛟螭瑁瑁之甲辟蠱犀角
辨鳩毒

龜得鑑則失溺螭瑁得醢則甲脫螬君相思子
得醢則相趁馬得僵蠶而齧牛食生鱸而肥蚌
聞雷而瘕雞鶩聞磨聲則癩鸚鵡中寒則噤狻
著地而瀉乳羊食仙茅而肪鵲食槐實則腦實
如玉鳩食桑椹則醉虎食狗則醉蛇食茄則醉
貓食薄荷則醉羊食僊靈脾而益淫

燒雄黃致水蟲磨鐵致螻蛄燒翼集鼠燒龜致
鼈莽草熏庶蠱屨炭攻狸蟲牡鞠辟毒龜干支

列宿之號去天鳥孔雀茹文繡倒掛之鳥翕香
淫魚嗜音鶯毛之魚赴燈燭

後猊之威伏百獸天鐵熊之力踣獅象鴟擊鷹
蚺吞鹿熊擘鱗鶴截蛇蜚竭水欽原蠹木獬狃
一騰輒百五十步犛牛橐駝日行三百里後麕
日五百里騶吾日千里角端日行萬里雕察秋
豪於雲際龍察纖芥于百里之外鶻之鬪也期
必死橐駝之任也期盡其力

蜂無王而盡死獠失偶而自刺鴛喪匹則以思
死鰥貫其牡則其牝羣赴而援之魴攫極則頰
尾杜鵑啼苦則血出象妬麝忌蛇龔虎龔蝟蝟鈍
狐疑蠶不交而乳者其蛾不眉雞鶩不交而卵
者嫗之不育

麝羊掛角麀以涎拒虎雖空鼻貉曲穴兔三窟
麝之窟也剔香穢也犛也蚘蛤也窟則自斷其
尾蛭蜣轉丸而嫗莫翮黏螻蛸而乳蟄熊舐其
白蟄蛇頤其黃解廌夏宿水澤冬宿松柏鯁魚
綠竹菴龜登木王鮪岫居丙魚穴處

棟蜜苦鯉膽其鬻血碧龜目黃猿通臂麕繞角
龜腸連乎首鬻口在腹貓睛晝狹魚目宵不瞑

象以鼻飲蟾以口糞蜂蜨以鬚嗅龍以目聽犀以角燭虎以目燭妖狐以其丹燭獮狙以猿爲雌蜥易以魚爲偶孔雀接蛇飛蛾匹蝶蟲螽妻蚓餘鼈同居諾龍雙處

海鶴之項五尺海燕儼于鳩海鷗儼于雁海牛之皮可鞞海豹之皮可鞞海驢之皮辟濡潮州有盈尺之蟻祖洲有八尺之鮒交廣之蝦須四丈黃州唧蛆衰交南越唧蛆之皮可以鞞鼓恩州有鷲毳之脰武陽滇池有一觔千頭之魚伊水有二足之龜從水有二足之鼈哥肱有兩頭之鳥互人有六首之鬮海陽有專車之蟹女丑有千里之蟹

神蛇斷而復續日及之牛月氏之羊割而復合壠種之臍可植而產也東流有麥魚焉越瀨則化而爲蜻蜓瞿塘之南有猿焉徙之北岸則不復啼舒蘄之郊產蛇焉其死也一瞑而一瞑產蘄州者瞋而不瞑他蛇之死瞑而不瞑

東海之鰈比目而後達北方之獲更食更視而後飽西方之鱉得蛭蛭距虛而後行南方之鷓比翼而後舉益州有二熟之蠶九真日南有人

熟之繭江南有吐蚊之鳥塞北有蚊母之草南
中有產蚊之木

鶴聲宜學仙雉聲宜習武烏聲宜習醫雁聲宜
習卜筮鵲聲宜習工巧梟聲宜習符呪鵲鴉之
醜飛以撥鳶鳥之醜飛以翔鷹隼之醜飛以翬
鳧雁之醜其足蹠鳥鵲之醜其掌縮鷲鳥小雄
庶鳥小雌雄翼右掩雌翼左掩陽龜方其首陰
龜長其足牡蠣左顧牝蠣右旋鸚鵡人舌而語
清吉了人耳而語濁

上棲也嗛羊也諸懷也駮駮也夫麟也四角之
獸也長右也縛狔也四耳之獸也麋也山馬也
四目之獸也解廌豸駮臙䟽辣辣一角之獸也
狻從六足獠三足蠶狂九首荼茂兩頭

一足之鳥有橐蜚焉有跂踵焉有畢方焉有商
羊焉三足之鳥有瞿駕焉有酸鷓焉三首之鳥
有鵠余焉九首之鳥有鶻焉有鬼車焉鷓四足
鷓六足鷓鷯六足而三首鯨魚鱗遺給給皆六
足何羅之魚一首而十身鯉之魚十翼

午夜鳴則廌羊冷毛而毳則羶犬赤股而躁則
臊鳥曠色而沙鳴則狸豕盲眈而交睫則腥馬

黑春而般臂則螻凡食物狼去腸狗去腎狸去
正春兔去尻狐去首豚去腦魚去乙鼈去醜舒
雁之翠也鵠鴟之胖也舒鳧之翠也雞之肝也
雁之腎也鴝之奧也廉之胃也皆在所弗食也
燕魴之毒在尾河豚之毒在肝人面魚之毒在
身其味在目雞六指羊一角鼈二足牛獨肝鳥
目瞋兔目瞑禽畜之肝青鮎之鬚赤食之者皆
殺人

玄覽卷之八

豫章朱謀璋鬱儀甫著

變恠篇

天有時而裂地有時而坼山有時而移水有時
而卓川有時而竭石有時而泐日有時而食星
有時而隕月有時而不虧海有時而冰潮有時
而不至天地有大陽九大百六焉有小陽九小
百六焉天厄謂之陽九地虧謂之百六大期九
千九百年小期三千三十年陽九者天旱海消
而陸燠百六者海水竭而陵自填

歲星之精降而為貴臣熒惑降為童兒歌謠嬉
戲鎮星降為老人婦女太白降為壯夫處於林
麓辰星降為婦人

竹王興於豚水志梵產于林檎之瘦寶誌生于
鷹巢之中九隆孕于沈木望帝為杜鵑炎帝之
女為精衛雷公采藥之吏為啄木齊女為蟬伯
竒為鷓懷王為楚魂江漢貍人為虎也滇之擺
夷為羊也姑獲之鳥為女子橫公之魚為丈夫
狐五十歲為婦人百歲為美女為神巫丈夫千
歲而與天通謂之天狐千年之狐姓趙姓張五

百年狐姓白姓康

鮫化為黃熊夏桀有宮女化為龍尋復其形命
曰蛟妾紂之世有女子化為丈夫周宣王卅二
年有馬化為人卅七年有馬化為狐幽王時有
牛化為虎漢哀帝時豫章有男子化為女魏文
帝時河清宋母化為鼈吳時宣母化為龜隋開
皇中霍州老翁化為虎相州有桑門化為蛇
山中夜見火光者枯木朽竹之所為也海中夜
見萬炬者鹹精夜動風雨之所擊也戰敗之野
夜見火光者人馬積血之所為也

稷米爲鮒腐草爲螢朽麥爲蜨蝶朽稻爲菴朽
木爲蟬腐菌爲蜂朽竹爲蜻蜒朽瓜爲蠹魚荇
莖爲鱣蒿爲螻螻田鼠之爲鴉也田雞之爲鷓
也雉之爲蜃也燕雀之爲蛤也寒鳥之爲鰌也
公螭蛇爲鱧木蠹爲螽蟴蟲爲蝙蝠老獠爲猿
石首之魚爲寇鳧鷖爲鷓鷃爲布穀布穀久復
爲鷓也鼃亦爲鷓服翼亦爲魁蛤黃魚爲鸚鵡
泡魚爲豪豬海鯊爲虎海魚爲黃雀

六畜之物以及龜蛇魚鼈草木之屬其神皆能
祇恠謂之五酉五行之方皆有其物酉者老也
物老則爲恠矣木石之恠曰夔罔兩水之恠曰
龍罔象土之恠曰羴羊凡山中大樹能語者其
精名曰雲陽山水之間見吏人者名曰四微山
中見大蛇者冠幘者名曰升卿呼其名則吉
山中寅日有稱虞吏者虎也稱當路君者狼也
稱令長者老狸也卯日稱吏人者兔也稱東王
父者麋也稱西王母者鹿也辰日稱雨師者龍
也稱河伯者魚也稱無腸公子者蟹也巳日稱
寡人者社中蛇也稱時君者竈也午日稱三公
者馬也稱仙人者老樹也未日稱主人者羊也

稱吏者獐也申日稱人君者猴也稱九卿者猿也酉日稱將軍者雞也稱捕賊者雉也戌日稱人姓字者犬也稱成陽公者狐也亥日稱婦人者金玉也稱神君者豬也子日稱社君者鼠也稱神人者伏翼也丑日稱書生者牛也但知其物名即不能爲人害

火之精名曰畢方狀如鳥而一足木之精名曰彭侯狀如黑狗而無尾金之精名倉唐狀如豚居人家使人不宜其妻玉之精名曰岱委狀如美女而青衣水之精名曰罔象狀如小兒赤目黑色大耳而長瓜山之精有四一曰蛟形如小兒獨足足向後喜來犯人亦名超空亦名熱內其一如鼓一足而赤色其名曰渾亦謂之暉其一如人長九尺衣裘戴笠名曰金累其一如龍五色而赤角名曰飛龍見之者各以其名呼之即不敢爲害

故門之精名曰野狀如侏儒見之則拜呼其名宜飲食故臺屋之精名曰兩貴狀如赤狗以其名呼之使人目明故澤之精名曰冕狀如蛇一身兩首五采文呼其名可使取金銀故廢丘墓

之精名曰無狀如老役夫衣青衣而操杵好舂
以其名呼之使人宜禾穀凡左右有山石水生
其澗出流不絕者其精名曰喜狀如小兒黑色
以其名呼之使取飲食故水石之精名曰慶忌
狀如人乘車蓋一馳千里以其名呼之可使入
水取魚山之精名曰夔狀如鼓一足而行以其
名呼之可使取虎豹築室三年不居其中有滿
財長二尺見人則掩面又其精名曰忽長七尺
有小兒長三尺而無髮見人則掩鼻見之皆有
福也

故道徑之精名曰忌狀如野人行歌故淵之精
名曰觀之狀如美女好吹簫三軍所戰其精名
曰賓滿其狀如人首而赤目見人則轉故市之
精名曰問其狀如囹而無手足故室之精名曰
孫龍狀如小兒長尺四寸衣黑衣赤幘大冠帶
劔持戟故溷之精名曰卑狀如美女而持鏡呼
之則去廁之精名曰倚衣青衣持白杖故車之
精名曰寧野如輶車見之傷人目呼其名則無
害古道之精名曰作器狀如交夫善眩人故牧
弊池之精名曰髡頓狀如牛首見人則逐丘墓

之精名曰狼鬼善與人鬪不休爲桃弧棘矢羽以鴉羽而射之故曰之精名曰意其狀如豚絕水有金者其精名曰侯伯狀如人長五尺而衣五綵水木之精其名曰藻其長尺狀如老翁夏巢幽林冬潛于河

掘地得狗名曰賈亦名地狼掘地得豚名曰邪掘地得人名曰聚亦名無傷是皆物之自然者也掘地得犬牝牡各穴而處名曰犀犬畜之富昌掘地得肉或如赤菌而千目是名太歲厥有凶甌千歲木中有蟲曰賈誦狀如豚而兩頭百歲之狼化爲美女其名曰知女求爲人妻經年則食人呼其名則逃去虎化爲人好著紫褐人其足而無踵新屍之氣其精曰陰摩羅其狀若鶴而色蒼黑鼓翼而呼虎之所殺其鬼爲偃涸澤之精名曰慶忌其狀若人其長四寸黃衣黃冠黃蓋乘小馬好疾馳以其名呼之可使一日千里反報涸川之精名曰螭一首兩身其形若蛇其長八尺呼其名可使取魚鼈登山之神名曰俞兒其狀長尺而人物具焉見之者霸旱之妖狀如人長三尺袒而戴目疾走若風其名

曰魃亦謂之貉所見之國赤旱千里遇者取投
溷中則已

凡逐疫之神甲作食飶腓胃食虎雄伯食魅騰
簡食不祥攬諸食咎伯竒食憂強梁祖明共食
殍死者寄生委隨食觀錯斷食巨窮竒騰根共
食蠱凡十有二神

沈有履竈有髻丘有萃澤有委蛇野有彷徨戶
內之煩壤雷霆處之東北方之下者倍阿鯨龍
躍之西地方之下者泆陽處之

夷荒篇

夏禹東至搏木之地日出九津青羗之野攢樹
之所摺天之山鳥谷青丘之鄉黑齒之國南至
交趾孫樸續櫛之國丹粟漆樹沸水漂漂九陽
之山羽人裸民之處不死之鄉西至三危之國
巫山之下飲露吸氣之民積金之山共肱一臂
三面之鄉北至人正之國夏海之窮衡山之上
犬戎之國夸父之野禺彊之所積石之山
商湯之世入獻之夷東有符婁仇州伊慮漚深
九夷十蠻越漚鬣髮文身之國南有甌鄧桂國

損子產里百濮九菌之國西有昆侖狗國鬼親
枳巴鬪耳貫胷雕題離丘漆齒之國北有空同
大夏莎車姑他旦略豹胡代翟匈奴樓煩月氏
犍犁其龍東胡之國

成周王會之夷稷慎以大麀穢人以前兒良夷
以在子揚州以禺禺發人以鹿俞人以雖馬青
丘以狐九尾周頭以輝羝黑齒以白鹿白民以
乘黃東越以海蛤歐人以鱣蛇於越納姑妹珍
且甌以文蜃共人以玄貝海陽以大蟹自深以
桂會稽以鞮義渠以茲白央林以酋耳北唐以
閭渠叟以鼪犬樓煩以星施上盧以統牛區陽
以鼈封規規以麟西申以鳳氏羗以鸞巴人以
比翼方湯以凰蜀人以文翰方人以孔鳥卜人
以丹砂東北夷用闕木康人以桴苾州靡以費
費都郭以猩猩竒幹以善芳高夷以兼羊獨鹿
以邛邛距虛孤竹以距虛不令支以玄貘不屠
何以青熊東胡以黃羆山戎以戎菽般吾以白
虎屠州以黑豹禺氏以駒駘大夏以茲白牛犬
戎以吉皇之乘數楚以每牛匈奴以狡犬權扶
以玉目白州以比閭禽人以管路人以大竹長

沙以鼈魚復以鼓鍾蠻揚以翟舍吾以翡翠
皇明朝貢諸夷朝鮮以馬苧縠豹獺安南以犀
象白練沈水諸香暹羅以生象孔翠珊瑚瓊碧
硫黃薇木琉球以赤銅瑪瑙刀錫占城以龍腦
兜羅真臘以犀象黃蠟日本以劔鎧瓜哇以矛
鐵犀象苾布珠瓊碧血竭瑣里以紅撒哈刺西
洋瑣里以黑虎三佛齊以白獺火雞淳泥以玳
瑁熊皮倒掛百花以赤猴彭亨以腦檀淡巴以
苾布古里以寶刀蘇合龍涎滿刺加以熊狼白
麕縵鎖袂錫娑羅以玳瑁珠蕉小葛蘭以珠
蓋阿魯以象齒榜葛刺以琉璃紫膠錫蘭山以
水晶蘆薈細布蘇門答刺以番刀回青蘇祿以
竹布迤北瓦刺以貂駝馬鶻朶顏三衛以馬海
西女直以馬豹貂鷹鶻殊角哈密以玉石禽皮
烏思藏以氍毹毛纓甲冑長河以氍毹足力鐵
力朶耳思以明冑長刀董卜韓胡以甲冑毛纓
洮岷番族以馬刀明冑

占城有飛頭之民其目無眸踈勒之人其手六
指新羅之東有長人之國鋸牙鈎爪搏人而食
盛海之東其民穿冑赤水之東其民長脰繳濮

之民皆尾穴地乃坐孝臆之民赤面黃髮而綠
目歌祭之民黃目黃髮退波故臨之民正黑若
漆訶陵之民其死不漸大琉球之民老死其髮
不白丁零之國拳髮馬蹏日走三百里馬腦之
民雁聲馬蹏善走無脊之民三蠻之國穴居土
食而無腸胃盤瓠之種囉囉之變音出於鼻室
韋之北驅度寐之國坐浮水上距踊三丈軒渠
之西其民四舌而三腫禪國之民吐火兀良哈
之北其民日生項後獠獠之西木直之民有骨
肖人生于耳後東方有崢人焉其長九寸柔利
之民一手一足其膝前屈羽民卵生而長頭安
息犁軒之民善幻穿胃之東其民不死烏秣之
西其民懸度而猿飲北海之外其民一目毗舍
那有鳥語鬼形之民夏啓之北其人三首鑿齒
之東其民一首而三身

暹羅以人膽浴王足日本髡首有喪者乃蓄其
髮占城質疑獄于鰐魚烏菴辨疑獄則嘗之以
藥老撾獲人則以石礮其跟大食弼琶羅之國
以人尾聘婦婦家以牛尾報焉人尾者陽道也
牂牁之獠孕七月而生真臘之民十歲而嫁瓜

哇之民名而不姓麻羅奴之民親死則搥鼓聚族而食之東南海外女子之國感風而孕波斯以六月爲歲首五谿之民親死輒聚飲一月鑿龕以葬三年不鹽龜茲之俗以歲首七日鬪駝牛馬以上畜牧之息耗焉者以元日角擊甲士十歲之豐儉烏滸之國首生子輒殺而食之噉達之國十壑之民兄弟通室滑國之民親死輒自截其耳蔥嶺之西西女之國產男輒不舉也拂菻歲遣男子配焉茂州之西東女之國其貴人死剝其膚體納諸罽糝金屑而瘞之哥羅之死納諸金罽葬之海

天竺之國有聖水焉可以弭風濤干闥有濕沙焉可以禦饑積之渴有陷河焉須檉木乃濟西欄之國有天門焉夜恒不晦沙彌荼之西有虞淵焉日入有聲震如迅雷斯伽里之野有火穴焉四時出火遇石輒焚中林木則逝訶條之國有石罽焉能吐食飲以濟飢乏者晏陀蠻有井焉歲中再溢泉之所經砂石皆成黃金龜茲有泉焉狀如飴餠其流成川其氣臭惡飲之已厲西域苟夷之國有石駝焉其州出水能透金鐵

唯瓠葉可得而注之孝臆之國其泉鹹鹵不可
以飲取紫鑛塗地承雨水而飲之毗騫有燃火
之洲有木可績是謂火浣之布

扶桑以鹿乳爲酪吾涼愛達以馬乳爲飲以魚
爲食瓜哇以蛇蟻爲餌道明以蟲鳥爲餐弩耳
干以狗爲糧大食以駝象爲糧都播以百合爲
之飯訶陵以柳絮柳葉爲之酒七弗敵以蘇實
爲之餐高昌以登相之草爲之穀生黎以猴爲
鱸馬耳撻班以鼠子爲珍饌繳濮以老人饗賓
庫莫奚以稌粥契丹以麋酒

烏耗之國有驢無馬新羅無羊勿吉無牛羊琉
球無牛羊驢馬鞠國有鹿而無羊馬驅度寐有
豕而無它畜朝鮮有麋鹿麕麕而無鹿扶桑有
銅而無鐵日本無木棉夜郎無桑蠶烏桓無麴
南詔尋傳之蠻無絲纊挹婁無鹽鐵西域無茶
茗瓜哇有麻稻粟菽而無茶麥波斯無稻黍三
佛齊有米無黍鞠國有木無草日本有諸藥而
無甘草芎藭朝鮮無岡桐銀朱晏陀蠻無鐵印
都檐波真臘皆無雪霜勿斯里無雨蘇都識匿
之國無五穀

大琉球之衣以鬪鏤南詔之衣以波羅撥拔力
之衣以羊皮阿里驕之民鹿皮貫木葉而衣之
滑國以羊皮爲紙嘉良之夷以皮爲舟三佛齊
以椰葉爲瓦扶南以大若葉爲瓦拔悉彌以樺
皮爲瓦暹羅以茭草爲瓦朝鮮以布粟爲市日
本以漢唐之錢爲市暹羅以海貝爲市文身之
民以珍寶爲市晏陀蠻以蚌甲爲兵回紇以橐
駝耕駿馬之國以馬耕

玄覽終



